

06. okt. 2016

Neriniartitsivinni neriniartitsinerup naatitanut nungusaataangitsumik ingerlanneqarsinnaanera pillugu Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut. Misissuinermi ullumikkut uumasuutitut neriniartitsiviusut nunaminertallu taakkua qanittuaniittut ilanngullugit nalilersorneqassapput uumasut qassit naasoqassutsip nammassinnaaneraa, taamaalilluni piffissaq sivisunerusoq eqqarsaatigalugu tunisassiorsinnaaneq pitsaanerpaaq qulakkeerumallugu. Misissuinermi inerniliussaq UPA-2018-imi saqqummiunneqassaaq.
(Inatsisartunut ilaasortaq Suka K. Frederiksen, Siumut)

Siumumiit imatut oqaaseqassaagut.

Savaatillit aningaasarsiornerat neriniartitsiviit apeqqutaallutik pissarsissutaasarnerat ilisimaneqarpoq, aamma nunatsinni imminut pilersornissamik anguniagaqarnermut qulakkeerisussaavoq, siunissami neriniartitsiviit qanoq annertutigisumik nammataqarsinnaanersut pilersaarusionerqartariaqarmat nunalerinermi periarfissarititaasut eqqarsaatigalungit.

Assersuutigalugu imartat aalisarfiusut peqassussaat ilisimanngikkutsigu qanoq pisassiisoqarsinnaanersoq assortuussutaasarpooq, pisassiineq mississuinermik tunngaveqarpat oqimaaqatigiissumik pisinnaasarmata, taamaattumik misissuinerit pingaarutilerujussuupput tapersersussallugit.

Siunnersuuteqartup tungavilersuutimini oqaatigisaa neriniartitsiviit ingerlaavartumik ilisimasanik aallaaveqarnissaat pingaaruteqarpoq, savaatillit peqatigiit suleqatigalugit nalilersuisinnaanerit ilanngullutik sulissutigineqassasut kaammattuutigisariaqarput.

Uumasunut neriniartitsivinni ilisimaneqartariaqarpoq qanoq annertutigisumik pissarsissutaasinnaanersut tamannali qulakkeerneqassaaq misissuilluarnikkut, taamaattumillu

Naalackersuisunut kaammattuutigissuarput misissuinissamik siunnersuut tapersersoqqullugu. Tamannami pisinnaappat qulakkeerneqassaaq qanoq annertutigisumik pissarsissutaasinnaanera, soorlu Nunalerineq pillugu Ataatsimiititaliarsuup isumaliutissiissutaani maluginiagassatut nakkutigeqquneqarpoq, Imm.4.4. Inassuteqaatitigut taamatullu 4.5 silap pissusaata allangornera pillugu inassutigineqarmat nalunaarusiortoqassasoq.

Ilisimaneqarpoq savaateqarnerup saniatigut nersutinut allanuttaa aamma nunaminertanik atuisoqarmat, siunissamilu pilersaarusiortoqassappat pingaaruteqarluinnarpoq ilisimassallugu nunaminertat atorneqartut qanoq pissarsissutaasinnaanerat. Ilanngullugu maluginiaqqussavarput kommunerujussuanngornerup kingunerisaanik inatsisitigut naleqqussaaniissaq pisariaqalersimammat ullutsinnut pissutsinut naapertuutilersillugit.

Siunnersuuteqartup Suka K Frederiksenip tunngavilersuutimini saqqummiuppaa; neriniartitsiviit pillugit 1980-kunni misissuiffigineqarsimanerat pinngortitap allanngoriartornera eqqarsaatigalugu ataavartumik ingerlasimannginnera uparuartariaqarpoq.

Imminut pilersorneq ukiuni arlalinngortuni anguniagaammat ataavartumik malinnaatitsisumillu misissuinerit ingerlasariaqarput.

Misissuinikkut nunaminertat atorneqarsinnaasut pilersaarusiordfigineqarpata siunissami aningaasalersuinissanut najoqqutassaqarnerulernermik malitseqaannartussaavoq, taamaattumik siunnersuuteqartutuulli Siumumiit Naalackersuisut misissuissasut inassutigaarput, qulakkeerumallugu tunisassiorsinnaaneq pitsaanerpaaq misissuinermiillu inerniliussaq UPA2018-imi saqqummiullugu.

Taamatut Siumumiit oqaaseqarluta aappassaaneerisoqartinnagu Aalisarnermut Piniarnermut Nunalerinermullu Ataatsimiititaliami suliarineqarnissaa innersuupparput.

Jens Immanuelson

Siumut